



Rabu, 09 Pebruari 2022
Ogen: Ende-enden Salomo 2:8-17



Rupandu Si Mejile



Kasih Eros, e me keleng ate erkiteken ate ngena. Lit sura-sura saling memiliki, keleng ate man ndehara ras perbulangen. Salomo sinuliskan kitab enda encidahken keleng ate Dibata man bangsa Israel bagi keleng ate perbulangen man ndeharana ras sebaliknya. Dibata iumpamakan sekalak perbulangen ras bangsa Israel iumpamakan sekalak ndehara. Salomo encidahken keleng ate Dibata e si la ersibar ras tetap man bangsaNa.

Ngena ate ituriken arah ende-enden. Renungenta enda ende-enden sipeduaken. Sidiberu nuriken isi pusuhna uga riahna akapna natap impalna si reh ndahi ia kiam-kiam mentasi deleng-deleng ras ngepari uruk-uruk. Bagem belinna sura-sura impalna gelah jumpa. La gejpna latih amin pe mentasi deleng ras uruk-uruk. La gia belaskenna bagem atena jadona man impalna. E maka ialoi sidilaki ende-enden impalna e, alu nehken kata pendilo. Iiahkenna impalna ku mbalmbal, ngenanami jilena bunga-bunga si sangana terlak kerina, i je pe terbegi sora peri-perik rende, ras lit buah anggur mulai tasak. Si dilaki ngajuk impalna ngenanami uga jilena alam pemere Dibata. Tambah jilena adi ras impalna ia duana ngenanamisa. Tole nari ituriken sidilaki atena jadi man impalna, iandingkenna impalna e desken ndrapati si cebuni i bas lingling batu. Ndrapati si mejile rupana, melemuk ras cerdik. Nina man impalna, rupandu mejile bagi ndarapati e. Mejile labo rupa ngenca tapi biakna pe mehuli, melemuk, sorana mejile ras pedas bergerak/tanggap.

Tuhu kal adi ngena ate, kerinana iperdiateken, ras simehulina lalap ituriken. Bage me niarapken nandangi Moria i bas teptep jabuna. Lalap ateta ngena man perbulangen (selalu jatuh cinta). Perlu dalan-dalan ku alam ngenanami jilena tinapa Dibata ras jilena ukur pasangenna man bana.